

蜀

水

經

蜀水經卷之四

京山李 元太初

江水四

江水又南經彭山縣東北都江與皂江會流爲武陽江
卽合水也晉永和三年桓溫軍至青衣漢大發兵趣
合水以拒之其合流處今爲江口鎮鎮右有象耳山
李白讀書山中學未成棄去度鍼溪有老媪方磨鍼
許問何爲曰欲作鍼耳白感其言還卒業媪自言武
姓儂有武氏巖有太白書臺鎮左有平模山亦名彭

亡彭望彭女彭模平無諸名惟南中志彭望山爲是
蓋言山高可望天彭門也水經謂有彭祖冢名勝記
謂有彭女津皆附會後漢書曰建武十一年岑彭討
公孫述分兵泝都江而上晁夜倍道兼行二千餘里
徑拔武陽彭所營地名彭亡聞而惡之欲徙會曰暮
蜀刺客詐爲亡奴降刺殺彭晉書曰桓溫軍至彭模
弱嚴兵守輔自將步兵直指成都宋書曰高祖伐蜀
譙縱使譙詵率衆萬餘屯彭模夾水爲城朱齡石焚
其樓櫓四面並登卽時潰散

彭山縣古蜀王武陽地也秦惠王使張儀伐蜀蜀王拒戰不勝退走武陽獲之秦置武陽縣屬蜀郡漢改屬犍爲郡昭帝移犍爲郡來治王莽改戡成縣後漢復故宋分置江陽郡江陽縣齊移犍爲縣還治樊道梁分置靈石縣尋廢又改武陽爲犍爲縣西魏改犍爲爲隆山縣又置江州線水縣後周改州爲隆山郡線水爲白水縣隋開皇廢郡省江陽白水入隆山屬茂州唐貞觀元年省隆山入通義二年復置屬隆州先天元年改隆山爲彭山縣明改屬眉州

江水又南經鼎鼻山

宋朱齡石伐蜀立寨處見按益州記謂周德既衰九鼎淪散一沒於此或見其鼻然東周顯王四十二年九鼎淪沒泗水始皇嘗使數千人沒水求之不得益州記非也惟虞荔鼎錄載蜀先主章武二年龍見武陽之水九日鑄一鼎像龍形沉水中當是此鼎

長年云江口夫子巖二郎廟彭山縣共二十里雙滢子倒牽牛長河碛太和場黃沙壩共二十里

江水又南經眉州城東爲玻璃江

玻璃江在眉州城外狀其清澈也吳船錄謂冬時水清方夏潦怒濤漲皆黃流耳東坡詩云其餘玻璃江陸游詩云玻璃江水千丈深又云玻璃江上柳如絲眉州故武陽地也齊建武三年分置齊通郡通誼縣周閔帝二年改安樂縣尋改齊通縣隋廢郡改齊通縣爲廣通屬嘉州仁壽元年復改通義唐武德元年移眉州來治天寶改州爲通義郡乾元復爲眉州屬劍南道宋爲眉州通義郡屬成都路太平興國中改縣爲眉山元至元十四年改屬嘉定路二十年省眉

山入州明洪武九年改州爲眉縣十三年改州直隸
上川南道今隸建昌道○州城謂之卧牛城以其垣
而難攻也五代時攝守山行章所築宋淳化五年賊
李順攻之不下焉沿城多芙蓉謂之芙蓉城宋家安
國通誼編曰昔人評吾州山不高而秀水不深而清
列眉通衢平直廣衍夾以槐柳綠陰翳然小南門外
村家竹籬桃樹春色可愛橋之下流皆花竹楊柳泛
舟其間鄉人謂之小桃源○三蘓故宅在城內西南
隅卽名勝記紗線街也州南石佛鎮亦有東坡別業

東坡自嘉祐元年舉進士後僅以丁憂兩次歸蜀有
無別業未可知也思按蘇老泉墓據歐陽公誌銘葬

於彭山安鎮鄉可龍里明嘉靖壬子延按喻時按眉
問墓無所得因於藝頤山東二十里石龍東岸柳溝
山中設虛冢而去余承勛記謂可龍爲石龍之訛然
東坡王氏墓誌亦云可龍里非訛也又按老泉三女
一適程之才見菊坡叢話一適柳子玉稱延安夫人
右詞行世見墨莊漫錄而侯鯖錄又謂延安夫人是
蘇丞相子容之妹據歐公誌銘三女早卒則老泉卒

於治平甲午女無一存者林坤誠齋雜記乃云秦少
游爲蘓氏婿然少游娶徐主簿之女而東坡次韻秦
觀秀才見贈詩係相見之始時少游將入京應舉在
元豐元年戊午距老泉之卒已十有三年三女暨東
坡穎濱皆程夫人所生程夫人卒於嘉祐元年丙申
距元豐戊午則二十有三年趙開美東坡佛印問答
錄載諸談諸事末載蘇小妹能解佛印疊字詩考佛
印卽金山元長老東坡有施玉帶及蒜山卜居二詩
在元豐七年甲子無論小妹之亡已久卽佛印亦無

唱和未見其果能爲詩別後不聞追寄一語是非有
參寥辨才清順等相交之密也嘻妄矣

江水又南經葛頤山

山在江東七里狀如葛頤腹有龍洞宋時人日渡江
來遊故放翁詩曰只怪今朝空巷出使君人日宴葛
頤其下爲葛頤津唐貶右拾遺孟昭圖爲嘉州司戶
參軍田令孜使人沈于此有葛頤堰唐採訪使章仇
弼瓊所修堰長八十餘里灌田四萬七千七百餘畝
江水又東南受松江松江源出新津縣城南大江分支

爲桐梓堰南經州北盤龍山東南經回龍山合流爲雙
河口又東受醴泉醴泉源出醴泉山人角井東合筆架
山之龍潭水東入松松江又東南入江

桐梓堰卽華陽國志蒲江大堰灌郡下六門也唐開
元中章仇兼瓊開通濟堰大堰一小堰十自新津修
覺山引渠南下百二十里至眉州西南入江溉田千
六百頃今州志稱堰長三百餘里灌新津田四千六
百三十畝彭山田三萬九千二百一十二畝眉州田
二萬九千二百七十四畝五倍于唐矣

長年云黃沙壩趙溪濠牛關口墓頤堰狗脚灣眉州
共三十里廣家店王家場松江口石鼓鑽鴻化堰共
三十里

江水又折而西南受魚蛇水源出仁壽縣木梓山東南
經眉州南魚耶鎮又東入江

任豫益州記曰魚蛇水東北自陵州界入青神縣界
寰宇記曰籍縣南有地畝餘踏之軟動則泉涓涓旱
不涸湧不溢名曰息壤魚蛇水在其北導江水在其
南丹砂山在其西魏了翁孫氏書樓記曰爲樓儲書

由孫長孺始樓建於唐之開元至光啟元年僖宗御
武德殿書書樓二字賜之今石本尙存僞蜀燬於災
乃遺魚鮓

江水又南經青神縣城東

青神縣故武陽地也西魏恭帝三年分置青衣縣後
周改青神縣置青神郡隋開皇罷郡以縣屬嘉州唐
武德八年改屬眉州○縣名青神者青衣之神也舊
有雷堦廟班固以爲離堦也華陽國記望帝以熊耳
爲後戶今縣治北倚熊耳山連山競險接嶺爭高漢

河平中山崩地震水逆流懸澗有灘名壘坻亦曰鹽澗蜀江至此始有峽稱矣

江水又南經中巖

中巖藏邱壑之中幽谷深敞茂林蒼鬱坐舟中而眺望以爲神仙窟宅也相傳第五羅漢詰詎那道場亦云老慈姥龍所居皆附會之說初登抵慈姥磯有題名云子瞻子由與佩師至此院僧以險見止不知僕之所歷有百倍於此者矣丁未正月二十日書沿溪數折爲喚魚潭投飯潭中輒有魚數百出食之或抵掌

亦出見人不驚潭上卽慈姥巖巖下有泉奔突色如
乳而味甘投澗中卽潭源也宋邵伯溫大書中巖二
字於石字裡四尺過潭循山三里許有洞曲僂而入
如行牛角中謂之牛角洞洞中稍有隙處有伏虎巖
巖頂刻浮屠像石覆如屋巖半有小橋人屈曲行其
下沿緣洞壑俯仰竹石間又半爲太極池泉自洞中
流出爲玉泉黃山谷有玉泉銘刻石出洞拾級而登
有石筍三枝巋然如峯其筍之隙平則置屋側則鑿
磴斷則設橋溪則圍欄蓋邑之勝境也

江水又南受難江難江源出洪雅縣西北可募山東受
果溪果溪源出丹稜縣北徇孤山流入難難江又東經
眉州西南金流鄉爲金流江又東南受思漾水又東經
青神縣東南入江

難江亦名雍甘泉

丹稜縣故南安地也南齊分置齊樂郡後周武成中
改郡爲齊樂縣天和二年改齊樂爲洪雅隋開皇十
二年因縣南洪雅鎮別置洪雅縣而改縣爲丹稜屬
嘉州唐改屬眉州元省入州明洪武十三年復置○

縣北有丹巖色赤如飛旗下有多稜川故名

長年云鴻化堰黑龍場太平場水打林白菓灘青神
縣共三十里牛食碣象鼻子虎渡溪中巖寺劉家場
紅巖灘新路口鴨浦灘羅白渡雷打灘漢陽場泥頭
關共二十里按紅巖鴨浦二陰灘

江水又南經三峽

上犁頭峽中飛鷲峽下平羌峽俱東大江而流其中
杜詩外江三峽且相接也峽有太白亭上有石刻云
夜來月下卧醒花影零亂滿人襟袖疑如濯魄於冰

壺也李白書宋黃山谷爲作太白亭

江水又南受祝溪祝溪源出縣北石牛山東入江

石牛山亦名雲頭山有水自山頂流下瀑聲撼兩巖
間如雷下澗爲龍潭流入山谷凡有九折爲九溪西
南流爲祝溪祝公居之又爲竹溪環溪多竹志謂在
郎封竹溪王非也夜郎城在貴州遵義府桐梓驛西
三十里

江水又南受泥溪泥溪源出井研縣東北山谷南爲龍
門溪又西南受芙蓉溪又西南受麻坪水麻坪水源出

金銀岡南經千佛巖入泥溪泥溪又南經跳磴于受張
公溪又南經小萬渡入江

泥溪卽擁斯茫水唐王勃有麻平晚行詩云高低尋
戍道遠近聽泉聲泥溪詩云江濤出岸險峰磴入雲
危謂此也寰宇記曰水從陵州一百五十里由縣南
賴井六地南流湍流迅疾不通舟楫

井研縣故武陽地也漢有井研鎮晉安帝僑置江陽
郡後改西江陽郡西魏廢郡置蒲亭縣隋開皇十年
置始建鎮大業元年改蒲亭爲井研縣五年又改始

建鎮爲縣俱屬龍山郡宋咸平四年省始建元至元十二年省并研明玉珍竊據復置明洪武十年省尋復置屬成都府 國朝雍正五年改屬資州

江水又南受金牛河源出萬松山東入江

江水又南經嘉定府城東南

嘉定府故蜀王開明治也漢武帝開西南夷置南安縣屬犍爲郡梁太清三年改青州西魏恭帝三年改眉州後周保定元年復爲青州別置平羌郡平羌縣宣帝三年改青州爲嘉州隋開皇三年廢平羌郡爲

眉州平羌故縣爲峨眉而別置平羌縣九年別立峨眉縣而改故峨眉爲青衣縣十三年改青衣爲龍游縣大業二年改眉州爲眉山郡七年以平羌獠叛移治大江濱唐武德元年移眉州治通義別置嘉州天寶改犍爲郡乾元復故屬劍南道有犍爲沐源寺葦牛徑銅山曲灘施和平戎依名利雲溶川羅護柘林大池雞心龍溪賴泥可陽婆籠馬鞍始犁峨眉二十二鎮宋爲嘉州犍爲郡熙寧五年省平羌入龍游宣和二年改嘉州尋復故慶元元年以寧宗潛邸改

嘉定府開禧元年改嘉慶軍屬成都府元至元十三年改嘉定路總管府明洪武四年改府九年改州省龍游入之國朝雍正十三年改府置樂山縣○水經注謂青衣縣故開明治青衣江會襟帶二水按縣名五改曰青州以青衣水名曰眉州以峨眉山名曰平羌以平羌水名曰龍遊以開皇十三年伐陳治艦龍見舟中名曰樂山以縣西南至樂山名○城內府學前有丁東水水自山麓石洞流出時聞洞中泉滴聲良久一滴聲如方響宋黃山谷改爲方響洞城

北有爛柯仙洞四字東坡書城東有石堂溪流爲
明月湖入金花橋會大江名勝記曰樓臺亭榭雅與
勝會者都督府郡齋丁東院澄江樓明月樓壁津樓
萬景樓月榭碧雲亭

江水又南經九頂山下會泚水

泚水卽大渡水也九頂山亦名凌雲山上有九峯曰
集鳳榜鸞靈寶就日丹霞祝融擁翠望雲兌說九峯
立於東岸起伏聯絡遙遷而南末二峯當泚水之衝
巖穴奇峭引人入勝宋邵博清音亭記曰天下山水

之勝在蜀蜀之勝在嘉州州之勝在凌雲山山之南
山又其勝也蘓子瞻名其亭曰清音又南山之勝也
下有治易洞東坡摩崖書大字云聖作易購其數劉
傳吳識易祖蓋宋郡守吳秘得之於劉牧云爾按蜀
紀補傳謂嘉州十五景唐貞觀中刺史盧士瑤記曰
望靈峯曰西嶺曰石梁水曰後壑曰分溪塘曰桂竹
汀曰梭原曰茗岡曰六度潭曰長林閣曰望仙臺曰
青菡徑曰山梳園曰石壑院曰南州草堂併賦詩刻
之石上今皆不可考究蓋文人緣興而錫嘉名也然

孟蜀歐陽彬得嘉州刺史喜曰青山綠水中爲二千石作詩飲酒爲風月主人豈不佳哉蘇東坡曰生不願封萬戶侯亦不願識韓荆州但願身爲嘉州守載酒時作凌雲遊其勝概可想矣驛程記曰九峯稍南烏牛馬鞍二山鱗次江岸丹巖翠壁江流平遠戎瀘諸山宛在杯案昔人謂嘉州山水爲西州冠冕不虛也

烏尤山岷江流繞其下爲三江會流處中有洲爲黑水尾亦名青衣山岑參詩引曰青衣山在大江中屹

然迴絕巖壁蒼峭周廣七里長波四匝紀勝曰烏牛
山亦名離堆山在九頂山之左突然水中作犀牛狀
黃山谷題浩翁亭始謂之烏尤山有郭璞爾雅臺益
部方物略曰墨頭魚形若鱗長者及尺出嘉州歲二
月則至惟郭璞臺前有之里人欲怪其說則言璞著
書臺下魚吞其墨故首黑驛程記曰墨魚食硯墨所
化立春後泛子漁人以燈火照之輒止不去碑目曰
郭璞移水記謂世主播遷於是優游笑傲放意山間
乃於嘉州城東百步烏龍山鑿書巖蘓子由詩亦指

其注爾雅於此史謂璞無入蜀之文移水記有嘉州
二字則碑非璞手筆恐後人附會嘉州名始後周自
周已前安得有所謂嘉州哉入蜀記曰爾雅臺者圖
經以爲郭景純注爾雅於此然任昉述異記王應麟
玉海樂史賈宇記皆云在夷陵蓋爾雅有隄爲文學
注二卷後人誤以繫璞爾

江水又南經王波渡

吳郡錄曰蜀中稱尊老者爲波祖及外祖皆曰波又
有天波日波月波雷波此或王老王翁也宋景文謂

當作鱗

長年云泥頭關仙人腿燈盞窩大佛頭烏龜石紅巖
子母猪石板橋溪荔支灣雞公嘴稱桿灘小萬渡樂
山縣共五十里二江門烏牛山大佛巖馬鞍山落濠
烏水灘倒流子黃金碓紅巖子青竹碓王波渡連三
灘牛花溪共四十里按大佛巖險灘也○湧壘小岳
曰江自嘉州至荆門灘險之地凡三百餘舟人一一
能言其灘之名皆見字書洞疾流也水流沙上曰灘
水出尾下曰瀆回流漩轉曰漩石積水淺曰磧水疾

巖傾曰礧灘積相湊曰林水如轉轂曰漕水漫不流
曰沱潭下急流曰灘愚按奔流直下曰泝兩山相夾
曰峽大石壁立曰砮長石橫江曰梁湍激石發曰瀆
沱伏而漩曰腦碎石積登曰堆不流曰汧徐流曰漑
溪水橫通曰瀼石湍逼狹僅容一舟曰洪

江水又南受四望溪四望溪源出井研縣山中南經三
江鎮合榮縣之小溪南經四望山下又東受東賦溝又
南經大河壩入江

四望溪右有朝峩洞峭壁凌空寒潭映月達士往往

憇於此焉溪東獅子橋有鹽廠按四川產鹽之所數
十邑唯大寧鹹水自洞中流出晝夜不舍如泉源然
其他皆井鹽也雲安溫湯二井大者圍數丈小亦周
數尺與家井相似日汲不竭歲一淘其汗泥而已隄
爲富順及川北諸鹽井深十餘丈穴纔通竹竹筒去
其節底綴牛革善自爲開閉入水則開水滿則閉雖
涓滴不遺也上設轆轤牛馬挽致焉其井有巧匠善
識鹹脉而鑿之鑿不闕土唯以鐵錐五尺自上鑽之
竹纜攪使錐下勁如弓直如繩遇石通之遇泥亦通

之每穿井累年乃成仍以巨竹去節化牡相銜爲井之筒如井之深橫隔淡水而鹹水自上凡井久者淡水滲入者補其隙他物格雜者去其塞雖百丈而下由此穴出入而地位不爽也川北諸井皆鹽水健爲富順之間乃有火井凡火井陰冷如常家火導之闕如殷雷而火出焉以布撲滅之但餘冷氣矣火根離地寸許其下甚細上乃漸大高可數尺光芒異於常火燃可以煎鹽煮飯難石爲灰蒸木爲炭或引入竹竅以代薪燭則泥塗其口口熱焦而竹不焚或引入

猪脬而封其口盛箱囊中持歸夜以針穴孔而家火
導之則火自脬出照映一室又有油井色混濁而善
熾得火逼燃雖遇風雨或投水中不少熄也夜行以
竹筒貯而引之一筒可以行數里通志謂明正德間
得油於井筒溪豈前此無之耶今常有此井未足異
也

大河壩故玉津縣城水經注謂江水東至南安爲玉
津隋因置玉津縣左思蜀都賦曰東越玉津注云江
出璧玉故名華陽國志大江自瀾堰下至犍爲有五

津曰白華津里津江首津沙頭津江南津入犍爲有
玉津東沮津是玉津爲七津之一舊謂應靈縣治非
也應靈縣治大年溪口在榮縣或謂漢得古磬處然
漢書成帝綏和五年犍爲人得寶磬十六枚於水濱
上謂之寶磬洲時犍爲在武陽名勝記謂在彭山縣
鼎鼻山北之龍洲是也

江水又南經碁頤灘

亦名罩雞濠一水中分中有沙洲如碁頤之張其右
爲漢魚林三石對峙灘口謂之牯牛石又有二石賸

時難腰謂之魚兒石甚爲奇險明正德十一年巡按
盧雍僉事張思齊濬之給事中安磐記曰暮頤灘在
縣西十里石牙中橫江水走其上前壅後迫勢不得
不起而立衝撞噴薄叫號怒激聲聞數十里外舟人
上下咸默胎重足屏氣以幸無事一失其勢輒破壞
漂溺不可救人死是灘者歲以千計

江水又東南經犍爲縣城東北

犍爲縣故南安地也晉李雄時夷獠自牂牁入居之
後周分置沈犀郡武陽縣隋開皇三年廢郡改縣爲

犍爲屬戎州大業十一年分置玉津縣屬嘉州唐上元二年改犍爲屬嘉州宋乾德四年省玉津入之○犍爲有四自秦至漢武之犍爲治營縣則今貴州遵義縣也漢武移治犍道之犍爲則今叙州宜賓縣也漢昭移治武陽至齊始還犍道梁復改武陽爲犍爲則漢晉宋梁之犍爲皆今眉州彭山縣也隋改沉犀之武陽爲犍爲則今嘉定犍爲縣也

江水又南經沉犀山

赤壁峭臨江岸長延十餘里其下爲龍泉三澗所謂

上有赤壁數丈下有元水千尺也山有沈犀洞或曰
犀牛湯江處或曰李冰沉犀以厭水怪處此沉犀郡
所由名

江水又南受清溪清溪源出馬邊廳南烟草峯東經廳
城東北東經屏山縣西北受峽溪龍盤溪又東受楊溪
漏眼溪又東北經楊洪山下入江

其入江之處謂之孝女渡上有險巖名天生城亦謂
之孝女巖云漢孝女叔先雄自沉求父屍處按孝女
自沉在合江縣合江在漢爲符隸健爲故誤耳楊洪

山相傳楊洪故居然楊洪字季休健爲武陽人也又
按李太白詩峩眉山月半輪秋影入平羌江水流夜
發清溪向三峽思君不見下渝州蓋太白自嘉下渝
舟次清溪寄興之作峩眉在望平羌伊邇因所見及
之三峽其所向渝州其所下之處也唐宋清溪有驛
爲市烟繁華舸艦停泊之地故杜子美宿清溪驛有
奉樓張員外詩與地紀勝謂清溪驛在嘉州健爲縣
是也楊齊賢乃謂資州之清溪縣舟泛沱江與峩眉
平羌何涉天寶元年改牛鞞爲清溪縣自初出蜀在

開元初牛鞞尙無清溪之名何其謬也近王阮亭又指納谿之清溪愈遠矣

馬邊廳故夷地也雍正六年米貼夷反提督黃廷桂討平之置馬邊營乾隆二十九年置通判隸叙州府

○境內土百戶九日明州樂油石洞旁阿孤大長魯

威乃窠幹田壩麻柳壩窰黑阿招

江水又南經紫雲城

宋宣和間邵伯溫知果州擢提點成都路刑獄陞利州路轉運使康節嘗語之曰世亂蜀可居因自洛陽

遷居於此德祐初晉萬壽以紫雲城降元卽此城也
有石壁臨江上巖壑深遠幽尋數里有峯巒然樹木
森聳浮屠居其巔望之如在雲端摩巖刻雲亭曉烟
四字相傳楊雄故居紫子音訛不足據也舊有子雲
亭亭右有洞洞壁之上題曰大儒不文下筆動九天
風雨大將不武揮戈播萬里烟塵宋隱士王叔倫書
江水又南經下壩驛

驛南百枝溪出焉兩岸松陰蒼鬱碧水中流溪旁有
巖怪石巖峯爲行旅之患宋開禧二年邑人陳文饒

鑿平之有二石立江岸相去二百步上石冠服如僧
下石裙裳如女俗傳信逐女化石隔岸呼之聲輒應
謂之么姑沱殆因石形附會羅長源曰見石西俯則
以爲爲惠遠點頭見石東僕則以爲爲秦皇赴海流
俗附會可勝歎哉

江水又南受沐溪沐溪源出屏山縣沐川司北夷都山
東合左右二溪又東瀦爲孟密淵又東過月巖山又東
受龍溪又東入江

唐咸通十年南詔蠻入寇與官軍相持於大渡河蠻

分兵開道逾雪波奄至沐源川陷犍爲張無盡沐川
寨記曰南蠻常挾吐蕃爲中國患其路一出大渡河
一出沐川一出馬湖江其狹邪之徑曰榮經曰八面
箐曰中鎮曰賴因曰龍水曰陰川而沐川路常爲曠
集之地

長年云牛花溪老木孔竹根灘大河壩牛心灘鐵蛇
壩共二十里真武沱磨石巖西壩黃瓜槽石板溪金
臺林馬絆林象鼻林小墓頭大墓頭趙溪九蠻洞
笠林犍爲縣共六十里銅錢碛亂石堆龍泉三灣孝

女渡小鬼巖紫雲城么姑沱下壩驛共六十里黎園
灘沐溪口賴里壩老雅灘月波驛共六十里按真武
沱墓頭灘龍泉灣老鴉漩險灘也真武沱亦名道士
觀墓頭灘亦名叉魚子

江水又東南經月波驛受浞溪

外紀曰昔有阿泥居之溪以名明曹石倉詩曰月波
來夜宿月色似波明遇景一相湊觀空聊復情

江水又東南經宣化故城南

宋爲宣化縣明爲宣化驛吳船錄曰下壩百里至縣

又百二十里至叙州

江水又東南受越溪越溪源出簡州山谷南經榮縣西北受虎頭溪又東受谷才溪又東受玉字溪又東經長山下爲長山河又東受紫金溪又東南受梅子溪又南爲登頭溪入江

越溪一名清流河山秀水清居民厚樸春時兩岸紅綠不假人工自有天趣隱者常卜居焉以其道險而鄉遠也流經牛潦橋始通舟楫有栢林七里魚淺魚灣龍灘蘓葉諸灘

江水又東南受大牢溪大牢溪源出榮縣北鐵山南受
潭水溪又南受苦竹溪又南受照石溪又南受桂村溪
又南受桃葉溪又南爲黃沙溪入江

大牢溪亦名賴溪元和記曰隋大牢縣以溪名

江水又東南受蘓波溪蘓波溪源出赤巖山北入江

赤巖山謂之朝陽巖色赤如霞華陽國志曰焚道縣
濱江有故蜀王兵欄神作大灘其巖嶙峋不可登李
冰積薪燒之懸巖猶有赤白元黃五色魚從楚來至
此而止言畏巖嶼不更上也上有前後二潭瀑布千

尺懸巖而下狀如珠簾謂之水簾洞

江水又東南經師來山

山在縣之西郭山半有洞洞前有池植芙蓉其中爲
士人遊覽之所山前有鬱姑臺隋開皇初鬱姑將軍
屯師於此也或謂舟人見道者浮空止於峯頭因名
又謂女子鬱姑遇楊仙投修煉之術得道仙去又謂
宋楊道人遇仙子鬱姑於此皆妄說也

江水又東南經敘州府城北

江之兩岸大石屹立舊置鐵組橫截其處控扼夷羌

謂之鎖江津宋紹聖二年黃山谷由涪州別駕移戎
州遊此而樂之放浪山水間無復遷謫困窮之意因
賦詩曰鎖江亭上一杯酒山自白雲江自橫岸石有
鎖江二字又有墨妙二字皆山谷手書上有溪流源
自桂叢山來山谷名之爲涪溪有兩石對峙中通上
下曲折約身入之偃僂達於嶺其中廣處山谷壘石
爲九曲謂之流杯池蓋經名士之遊詠而山色改觀
矣山谷曰安得奇士盡刻杜甫兩川詩使大雅之音
復振三巴之耳哉邑人楊素聞之礮石請書刻之作

堂南郭東坡爲之記

叙州府故夔侯國也漢建元六年開夜郎置犍爲郡
夔道縣屬益州王莽改西順郡東漢復故尋移郡治
武陽蜀置郁郅戍後改爲郁郅縣齊移郡復還夔道
梁大同十年置戎州以地界西戎名周保定三年改
夔道爲外江縣隋開皇罷郡六年分置開邊縣治馬
湖朱提兩江口大業三年改戎州爲犍爲郡外江爲
夔道縣唐武德二年郡復爲戎州省郁郅三年復置
貞觀四年分置南通州開邊屬之八年改南通爲賢

州尋廢咸亨三年昆明蠻內附置殷州總州敦州尋
廢聖歷二年分置歸順縣開元十五年復置殷州天
寶元年廢殷州改鄆鄆爲義賓改戎州爲南溪郡乾
元復爲戎州屬劍南道上元元年廢歸順永泰二年
復置貞元二年韋臯表置戎州都督府領羈縻殷州
東公龍原韋川劍興五縣有石門龍騰和戎馬湖移
風伊祿義賓可封泥溪開邊平寇十一鎮兵焉後廢
宋爲戎州南溪郡乾德中省開邊歸順開寶九年避
諱改義賓爲宜賓熙寧四年省入夔道政和四年改

樊道爲宜賓咸淳三年宜賓隨州徙治登高山宜和
元年分置宜化縣政和三年改戎州爲敘州屬潼川
路元至元十三年置安撫司尋罷司立敘州徙治三
江口十八年升路明洪武六年改府置宜賓縣省宜
化入之○唐武德元年開南中因故同樂縣置南寧
州領味缺同樂升麻同起新豐隴堤泉麻七縣又復
隋故昆州領益寧晉寧安寧秦城四縣又復隋故協
州置東安西安胡津三縣又析協州置靖州領靖川
分協二縣又復隋葦州領安上唐興二縣四年南寧

州置總管府又置西濮州領濮水青蛉岐星銅山四
縣又置尹州領馬邑天池鹽泉百泉涌泉五縣又置
甘州領會三部神泉龍亭長和五縣又置西平州領
附唐平夷盤水三縣七年又析南寧州地置西寧州
領梁水絳二縣又置南雲州領勃弄匡川二縣又置
南龍州領望水唐封二縣又置哀州領楊彼樂疆二
縣又置西宗州領宗居石塔河西三縣又置西利州
領淡利十部二縣又置西豫州領唐豫七部二縣貞
觀三年改西豫州爲廉州八年改西寧州爲黎州南

雲州爲匡州西平州爲盤州恭州爲曲州十一年改
西濮州爲黎州南龍州爲鈞州西宗州爲宗州西利
州爲微州二十二年析郎州置麻英聲勤四州二十
三年諸蠻內附置傍望求邱覽五州貞元十三年置
浪川州領郎浪郎違何渡郎仁因閣五縣又咸州瀘慈
州歸武州嚴州湯望州武德州奏龍州武恒州南唐
州信州居州交州哥靈州又連州領當爲都寧邕遊
羅龍加平清坎六縣又析盈州置南州領播政百榮
洪盧三縣又析志州置德州領杜連萬巖二縣又析

扶德州置爲州領扶僧羅二縣又析鏡州置洛州領
臨津賓夷會城蕙樂四縣又析悅州置移州領移當
臨河湯陵三縣又置悅州置甘泉青賓臨川悅水夷
隣胡瑤六縣又置鏡州領夷郎賓唐漢琳宗建池臨
野井六縣又置鈞州置鹽水鈞山羅余臨居澄瀾臨
岷唐川尋源八縣又置志州領浮萍雞維夷賓河西
四縣又置盈州領盈川塗賽播陵施燕四縣又置武
昌州領洪武羅虹琅林夷朗來賓羅新綺婆七縣又
置扶德州領朱水扶德阿陰三縣又析鞏州置播朗

州領播勝從顏順化三縣又置驪州領驪殿天池方
陀羅藏播騁五縣又置騁州領斛木羅相二縣又置
濇州領拱平播宮羅谷三縣又切騎州領柝池奏麻
康託通議四縣品州領八稱松花牧三縣從州領松
花昆池武安羅林梯山南寧六縣荆連州領荆連羅
名新戍三縣又碾衛州領麻金碾衛涪麻三縣又析
盈州置播陵州析開邊縣置鉗州共六十四蠻州也
○路史曰夔音撲又音拍一作儻音棘風俗記曰夔
人夷中最仁有人道故字从人而夔紀所謂夔人之

富也者其邑漢高后六年城之武帝感相如言使縣
令南通焚道費功無成唐蒙南入斬之乃鑿石開關
以通南中迄於建寧二千餘里山道廣丈餘深三四
尺其鑿之迹猶存王莽改曰焚治名勝記曰焚人者
其先世本華人有罪貶遠方以棘圍之故其字從棘
从人漢制郡縣有蠻曰道故曰焚道其俗每歲六月
二十四日爲星回節競舉火把盈野居傍城郭與漢
人無異○水經注曰郁郅縣王莽之孱郅也益州大
姓雍閬反結壘於山繫馬柳柱柱生成林存水出健

爲郁鄒縣東南逕牧鹿縣北又東逕且蘭縣北又東
逕毋斂縣北又東逕鬱林定周縣爲周水又東北至
潭中縣注於潭二水東逕中留縣東阿縣入鬱鬱水
東逕阿林縣又東逕猛林縣又東逕蒼梧廣信縣又
東逕高要縣又南自壽泠縣注於海今宜賓無此水
江水又東南經城東南蠻津口瀘水自南會之

瀘水卽金沙江按岷江自羊膊發源至敘州行一千
七百里金沙江自翠石發源至麗江府界四千餘里
麗江至敘州三千餘里是金沙江之源較遠于岷江

爲江水正源也禹導江岷山故世宗之

江水又東北南廣江自南注之

江水又東北經伏犀灘

巖勢險峻狀如犀牛在縣東南六十里任豫益州記
曰伏犀灘東南六十里有黃魚像在焚道縣界

長年云月波驛打魚村餓虎子火仗碕泥溪蓼葉灘
太公濠宣化驛兵六十里楠木圍斑鳩石蟹洞口苦
蒿坪馬槽口龍床碕清牛溪真溪驛共六十里登頭
溪大盆石黃沙溪牛口驛共六十里貓兒灘龍灘子

蕪波溪蝦蟆口銅鼓灣紅巖雷劈石大佛沱楊家灘
鎮江津宜賓縣共六十里上白沙大溪口南廣洞啞
納磯涸水壩伏犀灘李庄驛共六十里枝蓼葉巖鐵
匠石龍漩子雷劈石瓦窰灘斑鳩石石鴨子馬耳灘
險灘也

江水又東北經李庄驛

唐長慶中戎州治也

江水又東北經魚符津

津有鴛鴦坻晉永和三年桓溫軍至青衣李勢發兵

拒之其將皆堅引兵自江北駕鵞圻渡向健爲益部
耆舊傳曰張員妻黃氏女也名帛員乘舟沒求屍不
得帛至沒處灘頭仰天而嘆遂自沉淵積十四日帛
持員手於灘下出時人爲之語曰符有先絡夔有張
帛吳白華入蜀文鈔曰異苑華陽國志太平御覽皆
作張貞貞夔道學士韓子方弟子

江水更東北經南溪縣城南

南溪縣故夔道地也後周置南武成隋改龍源成仁
壽改置協州南溪縣大業省州縣入開邊唐復置縣

屬戎州尋徙州來治貞元中州還治夔道長慶中州
復來治會昌二年州還治夔道乾符二年分置奮戎
城宋乾德中徙治奮戎城屬敘州府○縣南隔江二
里有琴山狀如琴橫洲渚間俗云無嶽則琴不鳴元
時熊萬戶聚土爲嶽以成其勢○城東一里龍騰山
名勝記曰龍騰山山半有洞深四丈李八百所鑿額
鎬李公洞入分書字畫遒勁可觀洞前有折梅亭宋
楊萬里詩曰一日身遊入百里三千花落九千年山
下有岑參別業明成化中掘得斷碑詩曰結屋依青

嶂開軒對翠巒樹成花兩色溪合水重流竹經春來
增蘭楫夜不收逍遙真得意鼓腹醉中遊蓋參詩也
溪北有橋曰黃渡魯直每游必經故名

江水又東北受夔溪夔溪源出下界石牌頭北受長寧
縣北鐵頂山之九盤溪又北入江

夔溪俗謂之青衣江古有青衣國與叙州相隣其人
玉蜀見漢衣冠逐沐內屬因以名江方輿紀要曰蜀
中青衣凡三其一在漢嘉卽大渡河所經漢書公孫
述僭據青衣人不賓是也其一在青神盤叢衣青教

民農事人皆神之是也其一在南溪古有青衣國慕
義來賓是也按漢武帝置青衣都尉在沅黎郡其後
據羌而王公孫述稱帝不肯賓服至漢安帝延光元
年其王子心慕漢制而求內附焉實一國也何緣敘
州之南復有青衣國亦附會矣

江水又折而東南經銅鼓灘

紀勝曰在大江之右波浪極險懸治坐乾此水生辰
不利近歲灘之上流生石積高十數丈壅蔽下流水
流翼出自是文風稍振按此亦堪輿家之妄植地雖

有理文本無風學之精粗由乎功身之通塞由乎命
而命又非三命五命之謂也願積學之士毋怨天嬉
遊之徒毋怨地焉

長年云李庄驛楊枋箐九溪林石筍沱葛坪灘鷺鷥
積南溪縣共六十里青衣江九洞灘銅鼓林木土濠
共三十里按鷺鷥九洞銅鼓險灘也